



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.151/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Bujar Muzaqi kryesues, Hajriz Hoti dhe Ramush Bardiqi anëtarë, duke vendosur përkitazi me ankesën e Subjektit Politik Lëvizja Vetëvendosje (LVV), me seli në Prishtinë, paraqitur kundër Subjektit Politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 25.01.2025, merr këtë:

VE N D I M

Refuzohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.151/2025 e datës 23.01.2025. parashtruar kundër Subjektit Politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët.

A r s y e t i m

Me datë 23.01.2025 PZAP-i, ka pranuar një ankesë nga subjekti politik Lëvizja Vetëvendosje (LVV), me seli në Prishtinë me të cilën pretendon se më 23 janar 2025, Qendra e Lëvizjes Vetëvendosje, në Skenderaj ka identifikuar banerin/posterin i vendosur në hapësirë publike/ndërtesë, në rrugën publike "Ilaz Kodra" në Skenderaj të kandidatit të PDK-së për deputet Jakup Nura.

Më tutje parashtruesi i ankesës thekson se me këtë veprim kandidati dhe subjekti politik PDK kanë bërë shkelje të nenit 34, paragrafi 1 nën paragrafi 1.2 të Ligjit Nr.08/L-228 për Zgjedhjet e Përgjithshme në Republikën e Kosovës-LZP, nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *"Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve."* Tutje parashtruesi i ankesës thekson se përmes këtij veprimi, subjekti përkatës, ka cenuar rëndë dispozitat përkatëse ligjore dhe duke u mbështetur në bazën ligjore dhe argumentet e lartcekura, ka kërkuar që masa e sanksionit të vendoset në përputhje me legjislacionin në fuqi.

Si provë parashtruesi i ankesës ka bashkangjitur një fotografi që dëshmon vendosjen e banerit/posterit në kundërshtim me LZP.

Më datë 24.01.2025, PZAP-i, e njoftoi subjektin politik Partia Demokratike e Kosovës (PDK), me seli në Prishtinë, për ankesën e paraqitur kundër tyre, duke i dërguar kërkesë për përgjigje deri me 25.01.2025 në ora 09:00.

Në përgjigje në ankesë të paraqitur me datë 25.01.2025, subjekti politik Partia Demokratike e Kosovës (PDK), ka kundërshtuar ankesën e parashtruar nga subjekti politik Lëvizja Vetëvendosje paraqitur kundër kandidatit për deputet nga radhët e PDK-së, z.Jakup Nura. Më tutje në përgjigje në ankesë theksohet se PDK në lidhje me këto pretendime, njofton PZAP-në se N.Sh “Foto Kabashi”, më datë 21 janar 2025, ka marrë pëlqim nga Komuna e Skenderajt, që të bëjë vendosjen e pano reklamave në shtyllat e ndriçimit publik, si dhe vendosjen e shpalljeve dhe publikimeve të përkohshme në muret e objekteve private dhe objekteve të tjera në afatin kohor një vjeçar e cila shtresë përbën numër të protokollit 09-334/01-0002929/25 dhe është nënshkruar dhe vulosur nga drejtori përkatës i kësaj drejtorie. Më tutje në përgjigje në ankesë është propozuar që të refuzohet si e pabazuar A.nr.151/2025 të parashtruar nga subjekti politik LVV dhe të konstatohet se veprimet e ankimuar, nuk përbëjnë shkelje nga neni 34 par.1 nën par.1.2 të LZP-së.

Si provë në përgjigje në ankesë ka bashkangjitur pëlqimin e Komunës së Skenderajt për Kompaninë N.Sh “Foto Kabashi” për vendosjen e pano reklamave në shtyllat e ndriçimit publik si dhe vendosjen e shpalljeve dhe publikimeve në muret e objekteve private dhe objekteve të tjera në afatin kohor një vjeçar.

Paneli pasi që shqyrtoj ankesën vlerësoi se :

-Ankesa është e pabazuar.

Paneli pas shikimit të shkresave të lëndës dhe përgjigjes në ankesë të paraqitur nga Subjekti Politik PDK, vlerësoj se pretendimet e Subjektit Politik LVV, janë të pa qëndrueshme dhe si të tilla i refuzoj për faktin se veprimet e përshkruara në ankesë nuk paraqesin shkelje të dispozitës së nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës. Andaj Paneli ka gjetur se në bazë të shkresave të bashkangjitura në përgjigje në ankesë në këtë rast, në bazë të Pëlqimit të lëshuar nga Drejtoria për Shërbime Publike të Komunës së Skenderajt, mbi shfrytëzimin e përkohshëm të hapësirës publike, për vendosjen e posterit në hapësirat/rrugët publike”, vërtetoi se vendosja e posterit nga kandidati për deputet nga radhët e Subjektit Politik PDK, është në pajtim me nenin 5 të Rregullores Zgjedhore Nr.07/2024, neni 5 Të drejtat dhe obligimet e subjekteve politike gjatë mbajtjes së tubimeve publike konkretisht nën paragrafi 1.2 “*të publikojnë dhe të shpërndajnë afishe përmes shtandëve apo në hapësira publike, reklama dhe material tjetër lidhur me një fushatë zgjedhore*”.

Andaj duke u mbështetur në nenin 117.3 të LZP-së ku përcaktohet se “*vendosja për ankesat nga PZAP-ja mbështetet në dëshmi të qarta dhe bindëse*”, Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se nga veprimet e përshkruara në ankesë nga parashtruesi i ankesës nuk paraqesin shkelje të dispozitave të lartcekura, dhe të njëjtën e refuzoi si të pabazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

Anr.151/2025 më datën 25.01.2025

Kryesues i Panelit,
Bujar Muzaqi



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.